

12/05/1997

Melayu kini luar biasa: Mahathir

KUALA LUMPUR, Ahad - Datuk Seri Dr Mahathir Mohamad hari ini mengakui pendapatnya dalam buku The Malay Dilemma mengenai ketidakupayaan orang Melayu mencapai kejayaan, dibuktikan tidak benar sekarang.

Perdana Menteri yang menulis buku itu berkata, keadaan orang Melayu sekarang amat jauh berbeza kerana mereka kini sanggup dan mampu mengejar sesuatu kebolehan jika diberi peluang.

"Saya mengaku bahawa dalam buku saya The Malay Dilemma, saya pada ketika itu berasa begitu kecewa sekali, sesudah bercakap dengan banyak orang yang sebaya dengan saya tetapi nampak mereka tidak yakin. Saya pun terus tidak yakin orang Melayu boleh mencapai kejayaan.

"Sekarang saya reverse (menukar) saya punya stand (pendirian). Saya tak percaya lagi dengan apa yang saya tulis dalam The Malay Dilemma," katanya ketika menyampaikan amanat pada penutupan Forum Pengkisahan Sejarah Umno sempena sambutan ulang tahun ke-51 parti itu hari ini.

Buku yang diterbitkan pada 1970 dan diulang-cetak beberapa kali itu, pernah diharamkan di negara ini dan hanya dibenarkan penjualannya selepas Dr Mahathir menjadi Perdana Menteri pada 1981.

Dr Mahathir yang juga Presiden Umno berkata, kebolehan orang Melayu kini mencapai tahap luar biasa daripada golongan yang dianggap mundur sehingga berjaya dengan cemerlang.

Beliau menyebut anak penanam padi yang sekarang ini mampu memiliki syarikat kapal terbang setelah mendapat peluang menuntut ilmu.

"Orang Melayu tak kurang daripada orang lain ... bahkan kita sekarang ini menjadi guru kepada banyak bangsa lain. Mereka datang ke sini untuk melihat bagaimana kita dapat mengubah nasib kita dan membangunkan negara kita.

"Sekarang ini selepas 51 tahun Umno ditubuhkan dan 40 tahun negara kita merdeka, keadaan sudah berubah," katanya.

Timbalan Perdana Menteri dan Timbalan Presiden Umno Datuk Seri Anwar Ibrahim serta pemimpin Umno dari seluruh negara menghadiri sambutan ulang tahun itu.

Ia dimulakan dengan acara menaikkan bendera Umno serta perasmian Galeri Umno oleh Dr Mahathir.

Galeri itu yang terletak di lobi Menara Datuk Onn, ibu pejabat parti, mempamerkan sejarah penubuhan dan perkembangan Umno.

Dr Mahathir berkata, Malaysia perlu mengejar kemajuan dan membuktikan pencapaiannya dalam apa jua kemahiran untuk terus memikat perhatian dunia.

"Kalau kita kecil dan kita hendak orang tahu kita ada, maka kita perlu menjerit kuat-kuat supaya orang lihat di bawah ini ada satu manusia kenit.

"Tetapi kalau kita jadi gergasi, tak payah menjerit lagi ... kita berdiri saja, orang tahu kita ada," katanya disambut tepukan gemuruh.

Dengan mengambil bahasa sebagai contoh, Dr Mahathir berkata perjuangan orang kenit dengan gergasi berbeza dari segi kaedah, cara dan pendekatan.

"Soal bahasa, umpamanya ... masa kita kecil, kita menjerit, saya juga sama-sama menjerit dulu, bahkan saya menjerit lebih awal daripada orang yang dok menjerit sekarang ini.

"Saya tulis dalam Straits Times ketika di universiti dulu mengenai bahasa Melayu.

"Masa itu tak banyak orang bercakap mengenai bahasa Melayu tetapi masa itu perlu kita tekankan adanya bahasa Melayu.

"Tetapi sekarang, bahasa yang digunakan gergasi ini, tak payah dia

menjerit lagi kerana cuma perlu bercakap perlahan," katanya.

Dr Mahathir turut menceritakan pengalamannya ketika berada di selatan Afrika baru-baru ini untuk menghadiri Dialog Antarabangsa Selatan Afrika.

"Saya dengar pemimpin-pemimpin Afrika menyebut `terima kasih' bila tamat ucapan mereka. Bahasa kita sudah sampai ke sana," katanya dan sekali lagi mendapat tepukan gemuruh.

Ini membuktikan bahawa jika rakyat Malaysia menjadi bangsa maju, mempunyai intelek yang terkenal, membuat ciptaan barangan luar biasa dan boleh mengeluarkan segala barangan yang sekarang ini hanya dibeli daripada negara maju, negara lain akan berminat mempelajari bahasa Melayu.

"Bila kita sudah sampai kepada tahap itu, tak payah lagi kita kata belajarlh bahasa Melayu, tak payah kerana mereka akan datang dan belajar," katanya.

(END)